



## ҲИСОБ СИЁСАТИ АУДИТИНИ РЕЖАЛАШТИРИШ ТАРТИБИ

Зуфарова Зилола Рахим қизи -  
ТМИ мустақил изланувчиси

[https://doi.org/10.55439/ECED/vol23\\_iss5/a26](https://doi.org/10.55439/ECED/vol23_iss5/a26)

**Аннотация.** Мақолада аудиторлик текширувларида ҳисоб сиёсати аудитини режалаштиришнинг услубий жиҳатлари тадқиқ қилинган. Тадқиқотлар натижасида ҳисоб сиёсати аудитини режалаштиришда эътибор қаратиладиган жиҳатлар очиб берилган.

**Калит сўзлар:** бухгалтерия ҳисоби, ҳисоб сиёсати, молиявий ҳисобот, аудит, аудитнинг умумий режаси, аудит дастури, аудиторлик риски.

## ПОРЯДОК ПЛАНИРОВАНИЯ АУДИТА УЧЕТНОЙ ПОЛИТИКИ

Зуфарова Зилола Рахим қизи -  
Соискатель ТФИ

**Аннотация.** В статье рассматриваются методологические аспекты планирования аудита учетной политики при проведении аудиторских проверок. В результате проведенных исследований выявлены аспекты, на которые следует обратить внимание при планировании аудита учетной политики.

**Ключевые слова:** бухгалтерский учет, учетная политика, финансовый отчет, аудит, общий план аудита, программа аудита, аудиторский риск.

## PROCEDURE FOR PLANNING AUDIT OF ACCOUNTING POLICY

Zufarova Zilola Raxim qizi -  
Researcher TFI

**Abstract.** The article discusses the methodological aspects of planning an audit of accounting policies during audits. As a result of the conducted research, aspects were identified that should be paid attention to when planning an audit of accounting policies.

**Keywords:** accounting, accounting policy, financial statement, audit, general audit plan, audit program, audit risk.

**Кириш.** Мамлакатимизда аудиторлик фаолиятини ривожлантиришга, ўтказилаётган аудиторлик текширувлари сифатини оширишга кенг эътибор берилмоқда. Айниқса, кейинги йилларда аудиторлик фаолиятида халқаро стандартларнинг кенг қўлланилиши аудитнинг муҳим объектлари, хусусан, ҳисоб сиёсати аудитини сифат жиҳатдан янги босқичга олиб чиқмоқда. Бироқ ҳар қандай аудиторлик текшируви тизимли ўтказилиши учун, аввало, пухта режалаштирилиши керак. Шу боисдан ҳисоб сиёсати аудитини режалаштириш тартибини такомиллаштириш давр талаби ҳисобланади.

**Мавзуга оид адабиётлар шарҳи.** Норматив-ҳуқуқий ҳужжатлар ва иқтисодий адабиётларда ҳисоб сиёсати аудитининг моҳиятини очиб беришга оид кўплаб қарашлар мавжуд.

Д.Луговский ва М.Кутер таъкидлашчи, ҳисоб сиёсати ҳўжалик юритувчи субъектлар томонидан тузилиши мажбурий бўлган ҳужжат бўлиб, унга амал қилиш молиявий ҳисоботларнинг ишончилигига сезиларли даражада таъсир қилади [1].

Б.А. Хасанов, К.Т. Нурманов, Р.Б. Хасанова фикрича, “ҳисоб юритиш сиёсати ҳўжалик субъектларининг фаолиятини тартибга солувчи амалдаги қонунлар ва бошқа меъёрий ҳужжат-

ларда рухсат этилган бухгалтерия ҳисобининг алтернатив усуллари ва шаклларида корхона танлаб олган ва эълон қилган бухгалтерия ҳисобининг усуллари ва шаклларида йиғиндисидир” [2, 28].

Бир гуруҳ иқтисодчи олимлар таъкидлашчи, “ҳисоб сиёсати молиявий ҳисобда уни юритиш қоидалари, молиявий ҳисоботни тузиш ва тақдим этиш тартибини, бошқарув ҳисобида эса асосан корхона фаолиятини бюджетлаштириш, тахминлаш, таннарх ҳисоблаш, трансферт баҳони шакллантириш, сегментар ҳисобот тузиш масалаларини ўзида акс эттиради” [3, 21].

“Бошқа ахборотларга нисбатан аудиторнинг мажбуриятлари” номли 720-сонли АХСда “аудитнинг халқаро стандартларига мувофиқ аудитнинг бир қисми сифатида профессионал мушоҳада юритилиб, ҳўжалик юритувчи субъектдаги ҳисоб сиёсатининг тўғрилиги баҳоланиши шарт” [4] эканлиги белгилаб қўйилган.

Бир гуруҳ иқтисодчи олимлар таъкидлашчи, “аудитор аудиторлик текширувида нафақат молиявий ҳисоботни, балки ҳисоб сиёсатини ҳам кўриб чиқиши шарт. Бу орқали активлар ва мажбуриятлар тўғри тан олинганлиги ва баҳоланганлигига аниқлик киритилади” [5].

М.М.Меца “кенгайтирилган аудит ҳисоботларининг янги авлоди компаниянинг молиявий ҳисоботи ва унинг аудитидаги муҳим масалаларни ошкор қилишни ўз ичига олади. Ушбу ошкор қилиш, энг аввало, компанияда амал қилувчи ҳисоб сиёсатининг барча элементларини ҳам қамраб олиши шарт” лигини уқтириб ўтган [6].

А.С.Лосева, В.В.Акиндинов, Ю.С.Горохова ва Е.А.Солопова таъкидлашчи, “Ҳисоб сиёсати аудитини самарали ўтказишда агросаноат комплексининг бухгалтерия ҳисоби тизимида ҳосил бўлган барча маълумотлар оқимларининг тегишли равишда қонуний доирада акс эттирилишига эътибор қаратилади” [7].

В.В.Макаренко ва Л.О. Пудеян “ҳисоб сиёсати аудитининг мақсади молиявий ҳисоботларнинг ишончлилиги тўғрисида фикрни шакллантириш учун компанияда қўлланиладиган бухгалтерия ҳисоби методикасининг амалдаги меъёрий ҳужжатларга мувофиқлигини белгилаш ҳисобланади” [8] деган хулосага келишган.

Юқорида таъкидлаб ўтилган фикрлардан кўриниб турибдики, тадқиқотларда асосан ҳисоб сиёсатининг моҳияти ва аудиторлик текширувларида тутган ўрнига эътибор қаратилган. Бироқ ҳисоб сиёсати аудитини режалаштириш масалаларига етарлича эътибор қаратилмаган.

**Тадқиқот методологияси.** Ҳисоб сиёсати аудитини режалаштириш ва ташкил этиш қоидалари норматив-ҳуқуқий ҳужжатларда ўз аксини топган. Ўзбекистон Республикасида фаолият юритувчи хўжалик юритувчи субъектларда ҳисоб сиёсати аудитини режалаштиришни халқаро стандартлар асосида ташкил этиш аудитнинг илмий-методологик апаратини такомиллаштиришда муҳим аҳамият касб этади.

**Таҳлил ва натижалар.** Ҳисоб сиёсати молиявий ҳисобот аудитининг режалаштиришдан тортиб аудиторлик хулосаси шакллантиришгача бўлган барча босқичларида текширувнинг муҳим объекти саналади. Ҳисоб сиёсатининг турли жиҳатлари бўйича аудитни режалаштириш босқичида аудит текшируви учун вақт ва меҳнат харажатларини аниқлаш, аудит режаси ва дастурини тузиш учун рискни баҳолаш зарур. Мазкур жараёнда текширув вақтини ва унинг учун сарфланадиган меҳнат харажатларини асосиз равишда ошириб юборишнинг олдини олган ҳолда аудиторлик рискни минимал мақбул даражагача пасайтириш лозим.

Таъкидлаш жоизки, аудиторлик текширувларида аудиторлик рискни баҳолаш тўпланган аудиторлик далиллари ҳажмига янада асосли ва пухта ёндашиш, сегментлар бўйича танлов ҳажмини аниқлаш, таҳлилий амаллар ва батафсил текширувларни амалга ошириш учун зарур. Аудиторлик хулосасини тайёрлашда эса аудиторлик рискни баҳолаш молиявий ҳисоб-

ботларнинг ишончлилиги ҳақида якуний фикр ишлаб чиқиш учун зарур.

Фикримизча, умумий режа ва дастурни тайёрлашда аудиторлик ташкилоти томонидан бажариладиган амаллар натижалари батафсил ҳужжатлаштирилиши керак, чунки улар аудитни режалаштириш учун асос бўлиб хизмат қилади ва ҳисоб сиёсати аудитида қўлланиши шарт.

Ҳисоб сиёсатининг тавсия этилган жиҳатларини текшириш жараёнида аудиторлик ташкилоти умумий режанинг айрим қоидаларини қайта кўриб чиқиш учун турли ҳолатлар юзага чиқиши мумкин. Режага киритилган ўзгартиришлар, шунингдек, ўзгаришларнинг сабаблари аудитор томонидан батафсил ҳужжатлаштирилиши керак.

Ҳисоб сиёсати аудитини режалаштириш жараёнида аудитор қуйидагиларни ҳисобга олиши керак:

- реал меҳнат харажатлари;
- олдинги даврда вақт харажатларини ҳисоблаш (такрорий аудит ўтказиш ҳолатида) ва унинг жорий ҳисоб-китоб билан боғлиқлигини кўриб чиқиш;
- муҳимлик даражасини аниқлаш;
- аудит рискларини баҳолаш.

Фикримизча, умумий режада аудиторлик ташкилоти ҳисоб сиёсати аудитини ўтказиш усулини белгилаб олиши керак. Танлама аудит ўтказиш ҳақида қарор қабул қилинган ҳолатда аудитор аудит танлови кўламини шакллантириши шарт.

Аудит сифатини назорат қилиш ва бошқаришни режалаштириш бўйича қоидалар умумий режанинг таркибий қисми ҳисобланади. Ҳисоб сиёсати аудитини режалаштиришда қуйидагиларни кўзда тутиш тавсия этилади (1-расм):

Аудиторлик ташкилоти раҳбари умумий маънода ички аудитнинг ролини, шунингдек, аудит жараёнига мутахассисларни жалб қилиш заруратини белгилайди. Аудитнинг умумий режаси ва дастурини тайёрлаш жараёнида аудиторлик ташкилоти хўжалик юритувчи субъектда фаолият юритаётган ички аудит хизмати фаолияти самарадорлигини баҳолайди ва назорат рискни аниқлайди. Ички аудит хизмати нотўғри маълумотларнинг пайдо бўлиши тўғрисида ўз вақтида огоҳлантирса, шунингдек, нотўғри маълумотларни аниқласа самарали ҳисобланади. Ички аудит хизмати фаолияти самарадорлигини баҳолашда аудиторлик ташкилоти етарли аудиторлик далиллари тўплаши керак. Агар аудиторлик ташкилоти молиявий ҳисоботнинг ишончлилиги кафолати сифатида ички аудит хизмати ва бухгалтерия ҳисоби тизими таянишни мумкин деб ҳисобласа, у бўлажак аудит кўламини мос равишда ўзгартириши керак.



**1-расм. Ҳисоб сиёсати аудитини режалаштиришда эътибор қаратиладиган жиҳатлар**

*Манба:* муаллиф томонидан ишлаб чиқилган.

Аудиторлик текширувининг ушбу босқичида ҳал этилиши керак бўлган энг муҳим масалалардан бири ўзаро боғлиқ томонларни аниқлаш ҳисобланади. Улар тўғрисидаги маълумотлар, агар муҳим бўлса, ошкор қилиниши керак. Томонлар амалга оширадиган битимларнинг табиати ва ҳажми, шунингдек, ўзаро қарзлар тавсифланиши керак. Бундай операциялар филиал ва бош корхона ўртасидаги олди-сотди операциялари, шуъба ва филиаллар ўртасида активлар алмашинуви, қарз ва молиявий ёрдам, шунингдек, мол етказиб берувчилар билан операциялар бўлиши мумкин.

Аудитор ишнинг биринчи кунидан бошлаб мижознинг ҳуқуқий ҳужжатлари: устави, рўйхатдан ўтганлик ҳақида ҳужжатлар, мулкдорлар йиғилишлари ва директорлар кенгаши мажлисларининг баённомалари билан танишиши керак. Уларда олинган фойда тақсимооти, дивидендлар эълон қилиниши, мукофотлар тўланиши, шартнома ва битимлар имзоланиши, бошқа корхоналарда иштирок этиш тўғрисидаги қарорлар, мулкни сотиб олиш, узоқ муддатли кредитлар бериш, гаров ва кафолатлар, имзо ҳуқуқига эга бўлган шахслар доирасини аниқлаш борасида маълумотлар бўлиши мумкин. Бундан ташқари мижознинг ҳолатини аниқлаштириш

учун шартномалар, битимлар ва келишувлар билан танишиш муҳимдир.

Ҳисоб сиёсати аудити дастури аудитнинг умумий режаси ривожини бўлиб, аудит режасини амалда бажариш учун зарур бўлган аудит амаллари мазмунининг батафсил рўйхатини ифодалайди. Дастур аудитор ёрдамчилари учун батафсил кўрсатма бўлиб хизмат қилади ва айни пайтда аудиторлик ташкилоти ва аудиторлик гуруҳи раҳбарлари учун иш сифатини назорат қилиш воситаси саналади.

Аудиторга аудит дастурини ҳужжатлаштириш, иш жараёнида иш ҳужжатларида уларга ҳаволалар киритиш учун барча аудит амалларини рақам ёки код билан белгилаш тавсия этилади.

Назорат воситалари тестлари ички аудит ва бухгалтерия ҳисоби тизимининг фаолияти тўғрисида маълумот тўплаш учун мўлжалланган ҳаракатлар йиғиндисини ифодалайди. Ушбу тестларнинг мақсади хўжалик юритувчи субъектни назорат қилиш воситаларидаги муҳим камчиликларни аниқлаш ҳисобланади.

Моҳиятига кўра амаллар бухгалтерия ҳисобида счётлар бўйича айланмалар ва қолдиқнинг тўғри акс эттирилганлигини батафсил текширишни ўз ичига олади. Моҳиятига кўра амаллар аниқ батафсил текширишлар учун аудитор

ҳаракатлари рўйхатидан иборат бўлади. Моҳиятига кўра амаллар учун аудитор бухгалтерия ҳисобининг айна қандай бўлимларини текширишини белгилаши ва бухгалтерия ҳисобининг ҳар бир бўлими бўйича аудит дастурини тузиши керак.

Аудитни ўтказиш шартлари ва аудит амаллари натижаларининг ўзгаришига боғлиқ ҳолда аудит дастури қайта кўриб чиқилиши мумкин. Ўзгаришларнинг сабаблари ва натижалари ҳужжатлаштирилиши керак.

Аудит дастурининг ҳар бир бўлими бўйича аудиторнинг иш ҳужжатларида расман акс эттирилган хулосалар аудиторлик ҳисоботи (хўжалик юритувчи субъект раҳбариятига ёзма ахборот) ва аудиторлик хулосасини тузиш учун ҳақиқий материал, шунингдек, хўжалик юритувчи субъектнинг молиявий ҳисоботи тўғрисида аудиторнинг ҳолисона фикрини шакллантириш учун асос бўлиб ҳисобланади.

Аудитни режалаштириш жараёни тугаганидан сўнг, аудитнинг умумий режаси ва дастури ҳужжат билан расмийлаштирилиши ва белгиланган тартибда имзоланиши керак. Аудитни режалаштириш босқичида корхонанинг ҳисоб сиёсати бўйича бошқарув ҳужжатлари мавжудлиги ва таркиби аниқланади.

Аудиторлик текширувлари тажрибаси шунини кўрсатадики, айрим ташкилотларда раҳбарнинг ҳисоб сиёсати тўғрисидаги буйруғи тасдиқланмайди. Шу тариқа, ташкилий-ҳуқуқий шаклларида қатъи назар, ҳисоб сиёсатини шакллантириш барча ташкилотлар учун, ҳисоб сиёсатини ошкор қилиш эса ўз молиявий ҳисоботларини эълон қилувчи барча ташкилотлар учун мажбурий эканлиги ҳақидаги қоида бузилади.

Раҳбар томонидан тасдиқланган ҳисоб сиёсатининг мавжуд эмаслиги аудиторга текширувнинг дастлабки босқичида аудиторлик текшируви ўтказилаётган корхона раҳбарияти томонидан бухгалтерия ҳисоби ва ички аудитни ташкил этишга етарлича эътибор бермаяпти, деган хулосага келишига асос бўлади. Бу, фикримизча, аудит кўламнинг чекланганлиги ва аудит ўтказишнинг имконсизлиги ҳақида фикр шаклланишига асос беради.

Бухгалтерия ҳисоби ва ички аудит тизимларини ўрганиш аудитни режалаштириш пайтида ҳам, бевосита аудиторлик текширувини ўтказиш пайтида ҳам амалга оширилади. Уларга ҳисобни ташкил этиш бўйича ишлаб чиқариш соҳаси корхоналарининг ҳисоб сиёсати оид масалаларни киритиш тавсия этилади. Аудитни режалаштиришда ташкилотда ҳисоб сиёсатини қўллаш изчиллик тамойилига риоя қилинганлигини аниқлаш зарур. Бунинг учун нафақат кўриб чиқилаётган давр учун, балки олдинги ва

айрим ҳолларда кейинги даврлар учун ҳам ҳисоб сиёсати бўйича буйруқларни кўриб чиқиш лозим. Аудитор 1-сонли БҲМСга биноан ҳисоб сиёсатига ўзгартиришлар киритишнинг ҳақиқийлигини текширади. Ҳисоб сиёсатига ўзгартиришлар раҳбарнинг буйруқлари билан амалга оширилиши керак. Бундан ташқари аудитор молиявий ҳисоботларда молиявий ҳолат ва молиявий натижаларга сезиларли таъсир кўрсатадиган ҳисоб сиёсатидаги ўзгаришларнинг оқибатлари ошкор қилинганлигини аниқлаши керак. Ушбу маълумотларни олиш учун хўжалик юритувчи субъектнинг молиявий ҳисоботларида илова қилинган тушунтириш хати ўрганилади. Аудитор ҳисоб сиёсатида норматив ҳужжатларда белгиланганидан бошқа ҳисоб усуллари-нинг мавжудлигига ва уларни молиявий ҳисоботга изоҳларда очиб беришга алоҳида эътибор қаратиши лозим.

Бундай усуллардан фойдаланиш, агар меъёрий ҳужжатларда тасдиқланган бухгалтерия қоидаларидан фарқли ўлароқ, улар ташкилотга ўзининг мулкӣ ҳолати ва молиявий натижаларини ишончли акс эттиришга имкон берадиган бўлса, асосли ҳисобланади. Шу билан бирга, умумий қабул қилинган бухгалтерия қоидаларини тегишли асос билан қўлламаслик ҳолатлари тўғрисидаги маълумотлар молиявий ҳисоботларга тушунтириш ёзувига киритилиши шарт. Аудиторлик текширувини ўтказиш жараёнида ҳисоб сиёсати аудитининг иккита асосий йўналишини ажратиб кўрсатиш керак:

- ҳисоб сиёсати тўғрисидаги буйруқда ва бошқа ички ҳужжатларда белгиланган ҳисоб усуллари мувофиқликни текшириш;

- текширилаётган хўжалик юритувчи субъектда қўлланиладиган ҳисоб сиёсатининг молиявий кўрсаткичларга таъсири ва уларнинг ишончлилиги тўғрисида аудиторлик фикрини шакллантириш.

Бухгалтерия ҳисобининг маълум бир қисмини текширишни бошлаганда, аудитор амалдаги меъёрий ва қонун ҳужжатларида кўриб чиқилаётган объектларни ҳисобга олишнинг қайси муқобил усуллари рухсат берилганлигини ва текширилаётган ташкилотнинг ҳисоб сиёсатида танланган вариантларни акс эттириш тартиби қандай эканлигини аниқлаши керак.

**Хулоса ва таклифлар.** Ўзбекистон Республикасида бухгалтерия ҳисобини халқаро стандартларга мослаштириш бўйича кўпгина ишлар амалга оширилмоқда. Хусусан молиявий ҳисобот халқаро стандартларининг давлат тилидаги расмий нашри тайёрланмоқда, бундан ташқари стандартларни қўллаш бўйича бошқа услубий ҳужжатлар ишлаб чиқилмоқда. Бироқ бухгалтерия ҳисобида, аввало, ҳисоб сиёсатини пухта ишлаб чиқиш давр талаби ҳисобланади.



Шу боис мамлакатимизда амалда бўлиб турган “Ҳисоб сиёсати ва молиявий ҳисобот” номли 1-сонли БҲМС талаблари халқаро стандартларга яқинлаштирилиши зарур.

Ҳисоб сиёсати бўйича меъёрий ҳужжатлар мазмунини таҳлил қилишда текширишнинг дастлабки босқичида олинган маълумотлардан фойдаланиш керак. Бизнинг фикримизча, бу босқичда ҳисоб сиёсатининг солиқ жиҳатини таҳлил қилиш билан параллел равишда ҳисоб сиёсатининг услубий жиҳатининг мазмуни очиқ берилиши мақсадга мувофиқдир. Зеро, ушбу таҳлил натижаларига кўра, молиявий ва солиқ ҳисоботининг кўрсаткичларини шакллантириш

нуқтаи назаридан ҳисоб сиёсатининг асосий жиҳатлари мазмуни ва алоҳида солиқлар бўйича солиқ солинадиган базани аниқлаш қонунийлиги тўғрисида фикр шакллантирилади.

Ҳисоб сиёсати аудитини режалаштириш жараёнида умумий режа ва аудит дастурига чуқур эътибор қаратилиши зарур. Умумий режа ва дастурда текширув давомида расмийлаштирилган ишчи ҳужжатлар таркибига аниқлик киритиш зарур. Ҳисоб сиёсати бўйича ишчи ҳужжатлар шундай расмийлаштирилиши керакки, у аудитор томонидан ишончли ва ҳаққоний фикрни шакллантиришга хизмат қилиши зарур.

### Манба ва фойдаланилган адабиётлар рўйхати:

1. Denis Lugovsky, [Mikhail Kuter](#). Accounting Policies, Accounting Estimates and Its Role in the Preparation of Fair Financial Statements in Digital Economy. *Integrated Science in Digital Age* (pp.165-176). DOI:[10.1007/978-3-030-22493-6\\_15](#)
2. Хасанов Б.А., Нурманов К.Т., Хасанова Р.Б. *Замонавий бошқарув ҳисоби*. –Т.: “LESSON PRESS” МЧЖ нашриёти, 2021. - 413 б.
3. Abdvaxidov F.T., Qo'ziyev I.N., Dadabayev Sh.X. *Buxgalteriya hisobi. Darslik*. –Т.: IQTISOD-MOLIYA, 2021. -464 б.
4. “Бошқа ахборотларга нисбатан аудиторнинг мажбуриятлари” номли 720-сонли АХС.
5. Ivana Mamic Sacera, Sanja Sever Malis, Ivana Pavic. *The Impact Of Accounting Estimates On Financial Position And Business Performance – Case Of Non-Current Intangible And Tangible Assets*. //3rd GLOBAL CONFERENCE on BUSINESS, ECONOMICS, MANAGEMENT and TOURISM, 26-28 November 2015, Rome, Italy. <https://www.sciencedirect.com>.
6. [Miguel Minutti Meza](#). The art of conversation: the expanded audit report. //Accounting and Business Research, 2021 Vol. 51, No. 5, 548–581, <https://doi.org/10.1080/00014788.2021.1932264>.
7. Лосева А.С., Акиндинов В.В., Горохова Ю.С., Солопова Е.А. *Аудит учетной политики организаций АПК*. // Наука и образование. **Том 5 № 2 (2022)**.
8. Макаренко В.В., Пудеян Л.О. *Аудит учетной политики организации*. //European science № 7 (49), 2019. Стр. 36-38.



### МОЛИЯВИЙ ҲИСОБОТЛАР АУДИТИДА МУҲИМЛИК ДАРАЖАСИНИ ҲИСОБЛАШНИ ТАКОМИЛЛАШТИРИШ МАСАЛАЛАРИ

[https://doi.org/10.55439/ECED/vol23\\_iss5/a27](https://doi.org/10.55439/ECED/vol23_iss5/a27)

**Хасанова Насиба Толибой қизи -**  
ТДИУ докторанти

**Аннотация.** Мақолада молиявий ҳисоботлар аудитида муҳимлилик даражасини ҳисоблаш тадқиқ қилинган. Тадқиқотлар натижасида муҳимлиликни ҳисоблаш билан боғлиқ бўлган муаммолар аниқланган ва уларни бартараф этиш бўйича таклифлар ишлаб чиқилган.

**Калит сўзлар:** аудит, муҳимлилик фоизи, ХАС, молиявий ҳисоботлар, МҲХС, ҳисобот моддаларини бузиб кўрсатиш, аудиторлик rischi.

### ВОПРОСЫ СОВЕРШЕНСТВОВАНИЯ РАСЧЁТА УРОВНЯ ЗНАЧИМОСТИ ПРИ АУДИТЕ ФИНАНСОВОЙ ОТЧЕТНОСТИ

**Хасанова Насиба Толибой қизи -**  
Докторант ТГЭУ

**Аннотация.** В статье исследуется расчёт уровня существенности при аудите финансовой отчетности. В результате исследования выявлены проблемы, связанные с расчётом значимости, и выработаны предложения по их устранению.

**Ключевые слова:** аудит, процент существенности, МАС, финансовая отчетность, МСФО, искажение объектов отчетности, аудиторский риск.